

दिनांक : 26.03.2026

समय : 18.45 बजे

आकाशवाणी जयपुर-अजमेर

प्रादेशिक समाचार

- केन्द्र सरकार राजस्थान सारु 10 फीसदी और कॉमर्शियल एलपीजी आवंटन री मंजूरी दीनी- मुख्यमंत्री सगळी पार्टियां री मीटिंग बुलाई ।
- मुख्यमंत्री भजनलाल शर्मा कह्यो-मौजूदा सरकार दो साल मांय धार्मिक ठौड़ां रा विकास सारु 25 करोड़ रुपया खर्च कीना ।
- सड़क परिवहन अर राजमार्ग मंत्रालय देश मांय साढ़े 300 ब्लैक स्पॉट मांय ऊं 280 मांय सुधार कीनो ।
- राज्य रा केई ज़िलां मांय जोरदार बायरो बाजण सागे हल्की बारिश-आवता दो-तीन दिन आंधी-बारिश चालती रेहवण रा आसार ।

000

केन्द्र सरकार राजस्थान सारु 10 फीसदी और कॉमर्शियल एलपीजी आवंटन ने मंजूरी दे दीनी है । मुख्यमंत्री भजनलाल शर्मा सोशल मीडिया रे ज़रिए आ जाणकारी दीनी । वे बतायो के इण ऊं प्रदेश मांय कारोबारियां री ऊर्जा जरूरतां पूरी व्हे सकेला । ई आवंटन सारु मुख्यमंत्री प्रधानमंत्री नरेन्द्र मोदी रो आभार जतायो है । ई बीचे रसोई गैस री कालाबाजारी रोकण सारु आखा राज्य मांय रसद विभाग अर प्रशासन री ओर ऊं छापा मार्या जा रह्या है । मुख्यमंत्री भजनलाल शर्मा आज रसोई गैस रा मुद्दा माथे सगळी पार्टियां री मीटिंग बुलायी है । मीटिंग मांय सियासी पार्टियां रा नुमाइंदां ने रसोई गैस री मांग अर पूर्ति ऊं जुड़ी जाणकारी दी जावेला । दूजी कानी रसोई गैस री कथित कमी रे कारण जनता ने व्हे रही परेशानी रे खिलाफ काल राजस्थान प्रदेश कांग्रेस कमेटी रो जयपुर मांय शहीद स्मारक सामी धरनो प्रदर्शन करण रो कार्यक्रम है ।

000

मुख्यमंत्री भजनलाल शर्मा कह्यो है के राज्य री धार्मिक ठौड़ां ने सांस्कृतिक चेतना रा केन्द्र रा तौर ऊं विकसित कर्या जा रह्या है । वे आज जोधपुर मांय लूणी रा एक आश्रम मांय राख्यी ज्या जळसा मांय बोल रह्या हा । श्री शर्मा कह्यो के राज्य री मौजूदा सरकार रा दो साल रा कामकाज मांय मिन्दरां रा विकास अर बणाई-चुणाई ऊं जुड़्या कामां माथे 25 करोड़ रुपया खर्च करी ज्या है ।

-----

मुख्यमंत्री कह्यो के प्रदेश मांय पाणी रो सुबीतो तैय करण सारु रामजल सेतु लिंक परियोजना अर इंदिरा गांधी नहर ने और बेहतर बणावण सरीखा खास कामां माथे ध्यान दियो जा रह्यो है । जनता रा भला ऊं जुड़्या कामां रो जिकर करता थकां श्री शर्मा कह्यो के गायां ने बचावण सारु गौशालावां ने तीन हजार चार सौ करोड़ रुपया ऊं बत्ती रकम री सब्सिडी दीरीजी है । मुख्यमंत्री कह्यो के सरकार टाबरियां री पढाई-लिखाई अर बालपणा मांय ब्याह ने जड़ ऊं खत्म करण सारु लगातार कोशिश कर रही है । वे भ्रष्टाचार ने बिल्कुल बर्दाश्त नी करण री नीति अर नौजवानां ने नौकरी-धंधा र मौका मुहैया करावण रो संकल्प दोहरायो । कार्यक्रम मांय केंद्रीय संस्कृति अर पर्यटन मंत्री गजेंद्र सिंह शेखावत ई मौजूद हा ।

000

मुख्य सचिव वी. श्रीनिवास आज कोटपूतली-बहरोड़ ज़िला रा नीमराना औद्योगिक हलका रो दौरा कीनी। वे औद्योगिक इकाइयां रा काम करण रा तरीका री जाणकारी लीनी अर कारोबारियां सागे मीटिंग कीनी। मुख्य सचिव कह्यो के साल 2047 ताई विकसित राजस्थान बणावण रा काम मांय नीमराना रो विनिर्माण मॉडल खास भूमिका निभावेला। मुख्य सचिव भारत अर जापान री कंपनियां रा नुमाइंदां सागे बातचीत कर र वां री समस्यावां सुणी अर वां ने आगी करण सारू अहलकारां ने ज़रूरी हुकम दीना। मुख्य सचिव कह्यो के राजस्थान औद्योगिक केंद्र रा तौर ऊं सामी आ रह्यो है अर निवेशकां ने पूरी मदद दी जा रही है।

000

देश मांय सड़कां री डिजाइन अर वां री हिफाज़त रा काम मांय सुधार सारू 40 हजार करोड़ रुपया ऊं बत्ती रकम खर्च करी ज्यी है। सड़क परिवहन अर राजमार्ग मंत्री नितिन गडकरी आज नई दिल्ली मांय सड़क सुरक्षा अभियान 2026 रे मौके अभिनेता आमिर खान सागे बातचीत रे दौरान आ जाणकारी दीनी। वे बतायो के हादसा री शंका वाळी करीब साढे 300 ठौड़ां मांय ऊं लगभग 280 मांय सुधार कर दियो ज्यो है। श्री गडकरी कह्यो के देश मांय मोटर गाड़ियां बणावण रा उद्योग मांय लारला कुछ बरसां मांय खासी बधोतरी व्ही है अर भारत रो ऑटोमोबाइल उद्योग दुनिया मांय तीजा मोटा उद्योग रा तौर ऊं सामी आ रह्यो है।

000

रेलवे संचार सिस्टम ने बेहतर बणावण अर कवच स्वचालित रेलगाड़ी सुरक्षा प्रणाली ने और बधावण सारू एक हजार 2 सौ करोड़ रुपया ऊं बत्ता खर्च वाळी परियोजनावां मंजूर कीनी है। रेल मंत्रालय रे मुजब मध्य रेलवे रा सगळा पांच मण्डलां मांय छह सौ करोड़ रुपया ऊं बत्ता खर्च रो दोवड़ो फाइबर संचार नेटवर्क बणावण सारू दो खास परियोजनावां मंजूर करीजी है।

000

प्रदेश मांय आज दुर्गाष्टमी अर रामनवमी आस्था सागे मणायी जा रही है। ई मौके घरां अर मिन्दरां मांय मां दुर्गा रा महागौरी रूप री पूजा-अर्चना करी जा रही है। जैसलमेर ज़िला मांय तनोट माता मिन्दर, कोटा मांय करणी माता मिन्दर अर बांसवाड़ा मांय त्रिपुर सुंदरी समेत खास-खास शक्तिपीठां अर राम मिन्दरां मांय खास अनुष्ठान कर्या जा रह्या है। ई सागे ई न्यारी-न्यारी ठौड़ां भगवान राम री शोभायात्रा ई निकाळी ज्यी। जोधपुर मांय निकाळी ज्यी शोभायात्रा मांय मुख्यमंत्री भजनलाल शर्मा ई शामिल व्ह्या। वे जनता ने बधाई देता थकां कह्यो के भगवान राम भारत री आत्मा है। मुख्यमंत्री कह्यो के भगवान राम री जिन्दगी मांय कर्तव्य री ठौड़ ओहदा अर मान ऊं हमेशा ऊंची रही।

000

राज्य रा केई ज़िलां मांय आज ई जोरदार बायरो बाजण सागे हल्की बारिश व्ही। जैसलमेर, जोधपुर, बीकानेर, नागौर अर शेखावाटी अंचल रा झुंझुनू अर सीकर ज़िलां मांय दोपहरां पाछे धूळो उड़्यो अर बिरखा व्ही। चूरू मांय ई झमाझम मेह बरस्यो। जयपुर, अलवर, दौसा अर भरतपुर ज़िलां मांय बादळां मंड्या रह्या अर कठे-कठे छांटो-छिड़को व्ह्यो। मौसम केंद्र जयपुर रा निदेशक राधेश्याम शर्मा बतायो के 28 मार्च ऊं राज्य मांय घणखर ठौड़ां आंधी चालण सागे बारिश व्हेवण रा आसार है।

000

प्रधानमंत्री नरेंद्र मोदी ने ओजू दुनिया रा सब ऊं लोकप्रिय नेता रा तौर ऊं स्थान दियो ज्यो है। अमरीकी डेटा एनालिटिक्स फर्म मॉर्निंग कंसल्ट कानी ऊं दुनियाभर मांय करी ज्या सर्वे मांय वां ने 68 फीसदी अनुमोदन रेटिंग हासिल व्ही। 2 ऊं 8 मार्च बीचे करायी ज्या सर्वे मांय प्रधानमंत्री मोदी दुनिया रा दूजा नेतावां ऊं आगे रह्या। स्विट्जरलैंड रा राष्ट्रपति गाय परमेलिन अर दक्षिण कोरिया रा

राष्ट्रपति ली जे-म्यंग 62 फीसदी अनुमोदन रेटिंग सागे दूजी ठौड़ माथे रह्या। चेक गणराज्य अर अर्जेटीना रा नेतावां ने क्रमशः 57 अर 56 फीसदी अनुमोदन रेटिंग मिली।

000

शिक्षा सत्र 2026-27 मांय सामाजिक न्याय अर अधिकारिता विभाग रा छात्रावासां मांय दाखिला री प्रक्रिया काल सरू व्हेला। विभाग रा निदेशक आशीष मोदी बतायो के विद्यार्थी विभाग रा नुवा पोर्टल अर एस.एस.ओ. आईडी रे जरिए अर्जी दे सके है। दाखिला सारू पहली लिस्ट 10 अप्रैल ने जारी करी जावेला। ई पाछे 23 अप्रैल, 4 मई अर 11 मई ने आगली लिस्टां छापी जावेला। सीटां खाली रेहवण री सूरत मांय bigy| vkvk| igy| ikvk रा आधार ऊं दाखिलो दियो जावेला। अर्जियां ऑनलाइन तरीका ऊं 31 मई ताई दी जा सके है।

000

झुंझुनूं जिला रा लूमास गांव रा महात्मा गांधी राजकीय विद्यालय मांय आज साइबर सुरक्षा जागरूकता कार्यक्रम राख्यी ज्यो। कार्यक्रम मांय साइबर थाना झुंझुनूं री टीम विद्यार्थियां, वां रा मायतां अर गांव वाळां ने डिजिटल सुरक्षा रा बारा मांय जाणकारी दीनी अर ऑनलाइन ठगी, ओटीपी फ्रॉड अर फर्जी कॉल ऊं बचाव रा तरीका बताया। ई सागे ई साइबर हेल्पलाइन नंबर 1930 अर ऑनलाइन शिकायत पोर्टल रा बारा मांय जाणकारी दीरीजी।

000

प्रधानमंत्री नरेन्द्र मोदी आकाशवाणी ऊं हर महीना प्रसारित कर्या जावण वाळा खास कार्यक्रम "मन की बात" मांय 29 मार्च-दीतवार ने विचार बतावेला। आ ई कार्यक्रम री 132वीं कडी व्हेला। ई सारू आप ई मुफ्त नम्बर 1800-11-7800 माथे 27 मार्च ताई राय दे सको हो। विचार नरेन्द्र मोदी एप अर माय जीओवी ओपन फोरम रे जरिए ई भेजा जा सके है।

000